


Joseph Loubet

**Li roso que
saunon...**



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

EN MEMÒRI DE MOUN PAIRE

FRANCÈS LOUBET

Coumpagnoun dóu Devé de Liberta.

Brun, lis iue blous e dous, lou gàubi d'un eros,
D'un luchaire d'antan, te vese! L'ermineto
D'un muscularous envanc mandado dins la post
Espeto lis estello e la rusco es lèu neto.

O Paire! Auriéu degu la garda ta destrau!
Quiha sus lou cresten di bastisso nouvello,
Mestierau coume tu, au boufa dóu mistrau
Auriéu larga li cant nascu dins ma cervello!

Estènt qu'aviés bouta toun sang aventurous.
Dins mi veno e ta fe dedins moun amo abrado,
Plus proche dóu soulèu e dóu cèu auturous
Auriéu, urous, viscu ma vido e moun astrado.

Mai, i'a douge an que nous laissères pèr treva
Li plano celestialo! A ma jouvo ardidesso
Inesperto, ai! trop grèu fuguè l'òutis reiva;
E de-vers la naturo, acamp de poulidesso,

Virère mis idèio. O Diéu! Qu'auriéu vougu
Viéure i mitan di tau, vesineja li pastre,
Caro e peitrino nuso e vesti coume un gus,
Mai libre coume tu, Paire, avuei dins lis astre!..

N'en soubro, au jour de vuei, pati-pata-pas-rèn
De mis espèr d'alon! Noste tèms de dardeno
Pèr l'ome a plus de plaço! Aro, i'a que de bren
Pèr lis ai mau-pelut! I'a plus que de cadeno